



# La speranza – sin chistas da muniziun

Dapi duas jamnas san ins visitar ella baselgia claustrala dallas soras **dominicanas** da Glion in'expoziun dad iconas. Ils dus artists ucrains Sonia Atlantova ed Oleksandr Klymenko muossan quei ch'els fan cun chistas da muniziun dall'uiara.

AUGUSTIN BEELI/FMR

Entrond ella baselgia dalla claustra da Glion seferman ins avon l'emprema tabla. Quella ei tschentada sin in cavalet da malegiar, muossa in cavalier che semeiglia sogn Gieri che mazza il drag. Sil scret sper la tabla san ins denton leger: S. Dimitri. Igl ei in dils sogns pli populars dallas baselgias ortodoxas cristianas. Dimitri ni Demetrios ei il patrun da Thessaloniki, Constantinopel e Venezia, el vala sco protegider dalla schuldada ell'uiara.

## Chistas per destruir veta

Forsa perquei han ins plazzau quella icona all'entrada dalla baselgia. Il sogn che la schuldada venerescha ha *Oleksandr Klymenko* scret sigl uvierchel d'ina chista da muniziun. En connex cugl art da far iconas discuoran ins da «sriver» e buca da malegiar. En tut san ins admirar, el silenzi che la baselgia claustrala derasa, 16 talas ovras.

Gl'artist ucrain e sia consorta *Sonia Atlantova* scrivan dapi il 2014, dapi las empremas attaccas russas egl ost dalla Ucraina, iconas sin chistas da muniziun. Els vivan a Kiev e han rimnau massa tals conteniders da lenn stabils, cun isaglia, guotas e strubas da ruina.

## Sin viadi tras l'Europa

Sin quei material scrivan els iconas dalla tradiziun ortodoxa. L'Ucraina ei ina naziun cristiana cun profundas ragischs tochen tiels apostels. Ina icona muossa sogn Pieder, autras Nossadunna dallas dolurs, ils arzaunghels Michael e Gabriel, sogn Gieri, lu sogn Antoni gl' eremit, era in sogn impurtont dalla Baselia digl ost.

«Las chistas da muniziun vegnan du-

vradas per destruir la veta. Nies siemi eis ei da contribuir alla pasch, alla veta. Ina icona sa buca frenar l'uiara, denton dar speranza», san ins leger alla meisa d'informaziun dall'exposiziun. Il project cul num engles «Icons on Ammunition Boxes» ha il pèr saviu presentar el parlament europeic a Brüssel, els parlaments dall'Ucraina e Lituana ed en Pologna. Sur Tiaratudestga, Italia ed autras tiaras ei ella vegnida en Svizra. Sora *Ingrid Gräve* ha viu ella ils 10 da settember digl onn vargau a Cuera, a caschun dil giubileum da 50 onns «Glaube in der zweiten Welt G2W». Durent in discuors ha Oleksandr Klymenko dumandau sch'ei fussi pusseivel da presentar las iconas ella claustra da Glion. Dils 26 da fevrer tochen ils 26 da mars 2023 ei l'exposiziun impressiunonta leu. Sco quei che las soras han confirmau, ei gl'interess gronds da veser las iconas sin chistas da muniziun.

**Il project d'art «Icons sin chistas da muniziun» san ins visitar tochen ils 26 da mars 2023, ella baselgia claustrala da Glion. L'exposiziun ei aviarta mintgamai da gliendisgis tochen sonda, dallas 9.00 tochen las 17.00, la dumengia dallas 11.00 tochen las 17.00.**



Ina dallas tablas cun Nossadunna.



Isaglia ei restada sill'icona da s. Pieder.



Icona digl arzaunghel Michael.

FOTOS AUGUSTIN BEELI